



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

***Komunikadu Imprensa***  
***Distritu Oe-Cusse***  
***24 Feveiru 2015***

**JSMP realiza treinamentu “Asesu ba Justisa” iha Suku Lalisuk – Oe-Cusse**

Iha 19 Feveiru 2015, *Judicial System Monitoring Programme* (JSMP) liuhosi Unidade Peskizador Jurídiku, realiza treinamentu iha Suku Lalisuk, Distritu Oe-Cusse.

Treinamentu ne’e partisipa hosi ema 38 ne’ebé kompostu hosi feto 28 no mane 10 ho kompozisaun partisipante sira mai hosi estrutura suku, comunidade sira iha suku refere no inklui Ofisiál Polísia Suku (OPS) feto na’in ida.

Materia treinamentu foka liu kona-ba krime sira ho natureza violénsia doméstika no importansia asegura evidensia relaciona ho kazu violénsia seksuál. Aleinde ne’e kobre mós komprensaun jerál kona-ba direitus umanus, kna’ar autór judisiáriu sira, kuadru legal sira ne’ebé vigor iha Timor Leste, tipu kazu krime tuir lei aplikavel no oinsa atu asesu ba justisa formal wainhira sai nu’udar arguidu ka vítima iha kazu krime ruma.

“Divulgasaun lei no funsionamentu sistema justisa formal ba iha estrutura suku sira iha area rural ne’e importante tebes tanba comunidade sira iha area rural atu akompaña dezenvolvimentu sistema justisa formal iha Timor-Leste no oinsa sira bele kontribui hodi hametin sistema justisa iha Timor-Leste,” dehan Diretór Ezekutivu JSMP, Luis de Oliveira Sampaio.

Xefi Suku Lalisuk, Sr. Jorge da Costa iha ninia abertura no enseramentu ba treinamentu refere apresia no agradese tebes tanba prezensa ekipa JSMP nian hodi fahe informasaun importante kona-ba lei no direitu umanu ba ninia comunidade. Tanba tuir xefi suku ne’e katak treinamentu ho materia refere, foin primeira-ves akontese iha nia suku.

Treinamentu ne’e hetan antusiasmu diak hosi partisipantes sira tanba durante hala’ó treinamentu partisipante sira ativu tebes hodi husu perguntas no rona ho atensaun wainhira fasilitador sira fo esplikasaun.

Partisipantes ida ho pozisaun hanesan estrutura suku konsidera katak baku malu entre feen no laen iha uma laran hanesan bikan ho kanuru mak baku malu nune'e la presiza lori to'o ba iha tribunál. Maske nune'e depois rona tiha esplikasaun hosi fasilidor sira kona-ba Lei Kontra Violensia Domestika ho nia tipu no natureza sira, partisipante ne'e inklui partisipantes sira seluk foin kumprende katak violensia domestika nu'udar krime públiku.

Treinamentu ne'e realiza tanba hetan apoiu husi **Canada Embassy Jakarta –Indonesia**

Atu hetan tan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Telefone:3323883 | 77295795